



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7

Kazakhstan nung Russia nunger sepai inyaksangshiba Blinken-i ashishi

State 5 nung Feb. 10 nungi shilem tenet lemsar election agitsü: EC

VOL. XIX NO. 86 (ADOK 86) DIMAPUR AMUNGNÜ (SUNDAY) AENJETI (JANUARY) 09, 2022 ₹ 5.00

## COVID-19 Nagaland: 9 dak putet & 11 taneptsü angu

**Kohima, January 8, 2022**

(TYO): Nagaland nung Honibarnü nisung 9 dak COVID-19 putet aser 11 taneptsü angu.

Tanü Dimapur nung nisung 8 aser Mokochung nung nisung ka dak COVID-19 putet. Külén, Dimapur nung nisung 11 taneptsü angu.

Nisung 32,264 rongnungi 30,401 taneptsü nguogo aser ibaji taneptsü angur 94.22% lir.

Nagaland nung tang nisung 79 anepaludar saka parnok 67 dakbo shirangba yimya kecha mali.

Hokolbarnü arishi küm 15 nungi 18 tanur 1,544 nem COVID-19 vaccine agütsüogo ta health department ketdangsüri ashi.

"Hokolbar tashi nung nisung 761,698 nem COVID-19 vaccine indang dose 13,42,400 agütsüogo" ta State Immunization Officer Dr Ritu Thurr-ia ashi.

Vaccine agirtemji frontline workers 60,985, healthcare workers 16,005, arishi küm 45 ser temapur 214,371 aser arishi küm 18 nungi 44 tsüngda alir nisung 470,337 lir, ta pai ashi.

Vaccine agirtem rongnungi nisung 580,702-i dose anaprong agiogo. Parnokji frontline workers 13,544, healthcare workers 179,695 aser arishi küm 18 nungi 44 tsüngda alir 338,836 lir, ta Dr Thurr-isa metetdaksü.

## Nagaland kübok Mon district-i national award angu

**Dimapur, January 8, 2022**

(Agencies): Nagaland kübok Mon district-i e-governance 2020-21 atema national award ka nguogo.

Hokolbarnü Department of Administrative Reforms and Public Grievances, Government of India-i Hyderabad nung 24 buba National conference on e-Governance sentong ayonga agidang iba sempet agütsü.

Mon district-i "Use of Information and communication Technology in the Management of COVID-19 scheme" atema Category 6 nung Silver angu. Deputy Commissioner Mon,

Thavaseelan K, Mon SDO Vineet Kumar aser Ilika Zhimomi nungeri "Technology in aid to Administration" ta ser mapatong inyak.

COVID 19 inyakyim benoka amshidang public-i timtem aser mepetmesü majurudaktsüsü atema iba mapatong tenzüik ta Mon DC Thavaseelan-i ashi.

Iba mapatong kübok Mon district nung online e-pass portal, Geo fencing, Deep Machine Learning and Predictive Analytics amshia contact tracing, quarantine centres & quarantined people tracking atema web portal aser online web platform amshi.

## Delhi & Mumbai nung nisung 20,000 tema dak COVID putet

**Mumbai/New Delhi, January 8, 2022**

(Agencies): India nung Covid-19 kanga puteter aser tanü Delhi o Mumbai yimitem nung nisung meyirjang 20 tema dak putetogo.

Tesüiba ghonda 24 tsüngda Mumbai nung nisung 20,318 dak COVID putet aser nisung 5 asü. Mumbai nung tang nisung 1,06,037 anepaludar.

Honibarnü Delhi nunga COVID-19 puteta alir nisung 7

asü aser nisung 20,181 dak putet. Delhi nung nisung 48,178 tashi anepaludar aser parnok rongnung nisung 25,909 tashi home isolation nung lir. Külén, nisung 1,586 mozü kitem nung anioka anepaludar aser parnok 375 tashi oxygen support agidar.

Tanü India nung nisung 1,41,986 dak COVID-19 putet aser parnok züngsema nisung ajak agi 3,53,68,372 kümogo ta Union Health Ministry-i metetdaksü.

## Nagaland, Meghalaya & Manipur dang tanur nem COVID vaccine agütsüsü tuyur

**Guwahati, January 8, 2022**

(Agencies): National Commission for Protection of Child Rights (NCPCR)-i Nagaland, Meghalaya, Manipur aser Punjab state tem dang pei pei state tem nung tanur nem vaccine agütsüba maparen ulushitsü tetuyuba agütsüogo.

NCPCR-i state chief secretary tem dang tanur nem vaccine agütsüba maparen ulushitsü indang shidi zülü.

May 2021 nunga NCPCR-i Indian Council of Medical Research (ICMR) dangi shidi zülü aser COVID-19 wara tasembuba atema tanur anepalutsü atema inyakyim meshia liasü.

"Tang COVID-19 wara

tanabuba ajanga lanur aika dak kongshir" ta NCPCR chairperson Priyank Kanoongo-i May 13, 2021 nü ICMR director-general Dr Balram Bhargava dangi shidi ka zülü.

"Linük nung COVID-19 wara tasembuba ajurutsü ta mongintemi ashir aser tanurtem dak kongshitsü. Supreme Court-i iba atema renemtsü nüngdakba shiogo, anungji Commission dang nenoki inyakyim talila bendenloka ali nungbo shiang" ta Priyank Kanoongo-i asüngdang.

India nung COVID wara tasembuba adokogo aser iba ya azüoktsü atema vaccine agütsüba maparen ulushitsü ta health experts-i ashir.

## Nagaland nung COVID-19 tenokdangbatem akangshir

**Dimapur, January 8, 2022**

(TYO): Linük nung COVID-19 kanga menatepba aser Omicron variant putetba nung ajemdaker Nagaland sorkari tenokdangba kar agütsüogo.

Nagaland nunga COVID-19 menatepa aotsü aser health infrastructure nung timtem bentsür arutsü akok ta bilemba nung ajemdaker COVID-19 azüoktsü atema tenokdangbatem agütsüsüsa akümer, ta Nagaland Chief Secretary, J Alam-i metetdaksü.

January 9 nungi January 31, 2022 tashi COVID-19 wara dak sendakba tenokdangbatem aser SOPs bentsüsü, ta paisa ashi.

Iba mapang lokti sentong nung nisung 50% mesüra teimba agia 200 tashi dang adenshitsu melar. COVID-19 agi shirangba yimya malirtem aser COVID-19 indang vaccine dose anaprong agirtem dang lokti sentong nung adensüsa. Koda masüba mapang ajurua lokti sentong tulu adenshitsu kümra pei pei

District Task Force (DTF) dang nungi temelaba meshitsüla, ta Nagaland sorkari tanü metetdaksü.

January 9, 2022 nungi aonung 9:00 ako nungi anepdang 5:00 ako tashi 'night curfew' alitsü. Ajisüaka, Nagaland nung manenzüki süiba khu abenba garitem, medical & tanga emergencies, tsünusenbongtsü maparen aser DTF temi temelaba agütsürtem 'night curfew' kübok madentsü.

Malls, shopping complexes, restaurants, gymnasiums, cinema halls/theatres, parks, places of entertainment, recreation areas nung nisung 50% dang adenshitsu melar. Item tesem semdangertem aser staff dak shirangba yimya malitsüla aser COVID-19 indang vaccine anaprong agirtem asütsüla, ta sorkarisa tetuyuba agütsüogo.

Tangalen nungi Nagaland-i aruba arishi küm 12 ser temapurtemi COVID-19 test report abentsüla. Nisung kar ket

nung negative COVID-19 test report melira aser shirangba yimya ajitetra pa/la dak COVID-19 tendangtsü aser iba atema sorkari lateta aliba taa agitsü. Nagaland nung tendangba osang quarantine nung alitsü. Iba inyakyim ya January 10, 2021 nungi tenzüoktsü, ta sorkarisa metetdaksü.

January 31, 2022 tashi Class VIII tashi physical /offline class magii atatsü. Class IX aser temaba class nung kaketshir aser arishi küm 15 junger alirtemi COVID-19 indang vaccine dose kabosa agir ali nung dang admission agitetsü mesüra regular/offline classes nung adentsü akok, ta Nagaland sorkarisa ashi.

Nagaland nung COVID-19 inyakyim aser SOPs alema inyakertem Disaster Management Act, 2005 aser IPC nung Section 188 kübok temerenshi alitsü, ta sorkarisa nenshia metetdaksüogo.

## NPCC-i Shamator-Chessore MLA anentsü akhanger

**Dimapur, January 8, 2022**

(TYO): Nübertem tsüngdang Yimkhiung Tribal Council (YTC) tenung memenüksü aser Congress party ashioktsüba atema Shamator-Chessore MLA S Keoshu Yimchunger-i mapa nungi anentsüla ta Nagaland Pradesh Congress Committee (NPCC)-i takhangba agütsüogo.

"Yaküm October ita by-election nung Nationalist Democratic Progressive Party (NDPP) candidate nem takok ngudaktsüra Shamator sub-division nungi district ajungkettsü Nagaland state sorkari nangzükbä ajanga Congress-i candidate meshimtsü

lemtet" ta NPCC President K Therie-i tanü sangdong ka nung ashi.

Iba by-election nung NDPP candidate den tetokteper shinga melii takok ngudaktsü aser iba ya sorkari nangzükbä ama inyakba liasü, ta NPCC-i ashi.

"Onoki YTC dak temolung alem aser iba jagi Shamator sub-division nungi district akümtsü pusema nominations magütsü" ta parnokisa ashi.

"Sorkari kanga nendaka aser ochishia nangzüik ta onokibo bilem aser aika ajangshia aruba chief minister kati iba amai ochimashi inyaktsü onoki kodanga meimla. Shamator nem

district magütsüba ajanga Yimkhiung nunger mepetmesü adokdaksüba ya jungjunga meshisadangi nangzükbä ajanga lir" ta K Therie-i metetdaksü.

"Yimkhiung aser Tikhir nunger tsüngda ken o adoker küm 35 tema süia arur aser sorkari ibaji meteta lir anungji parnoki meshisadangi tenangzükbä agi" ta paisa ashi.

"Nagaland state cabinet-i civil society teloktem den jembishinütsü atema third-party committee ka tentetbaji mapang atsülangtsü aser tebilemstü khuret tangar nem benloktsüsü atema lir" ta NPCC-isa metetdaksüogo.

## Assembly election mapang COVID-19 nungi jenbua alitsü metetdaksür

**New Delhi, January 8, 2022**

(Agencies): Honibarnü Election Commission of India (ECI)-i state pungu nung assembly election agitsü osang sangoktsüba sülen healthcare experts-i inyakyim kar bentsüsü shiogo.

Election agitsü aliba state tem nung nisung o nisung tsüngda tepila ayutsüla aser rally tem nung nisung adentsü latettsüla. Wara mapang tamajung mapang Covid inyakyimtem shitak mebenshira timtem aika ajurutsü ta tanü healthcare experts-i metetdaksü.

"Political party temi physical campaigning malitsüla aser online rally tem dang ayonga agitsüla" ta Founder Director, Ujala Cygnus Group of Hospitals Dr Shuchin Bajaj-i ashi.

"Asenoki Covid inyakyim alema meinyakdaksütsüla. Kiyimba sentong nung nisung 20 dang adentsü melara Election Commission-i political rally attendance latettsüla" ta Bajaj-i ashi.

"Ajak atema tongtipangtiba

mapaji vote enoktsür ajaki Covid inyakyim bentsüla" ta Chief of Strategy, Indian Spinal Injuries Centre Sugandh Ahluwalia-ia ashi.

"Vaccine indang dose anaprong agirtembo vote meinokdaksütsüla. EC-i polling booth ajak nung nisung o nisung tsüngda tepila ayutsü atema inyakyim latettsüla. Nisung shinga mask meinoki maitdaksütsüla aser infrared thermometers ajanga tendangtsüla" ta Ahluwalia-isa ashi.

Iba senden nung State temi Covid azüoktsü aser anepaluba maparen inyakba osang metetdaksüogo, ta Health Ministry-isa ashi.

ECI Honibarnü state pungu nung Assembly election agitsü indang anogotem metetdaksüogo.

February 10, 2022 nungi Assembly election tenzüoktsü aser shilem tenet lemsar agitsü. Taküm Uttar Pradesh, Goa, Manipur, Punjab aser Uttarakhand nung assembly elections agitsü.

February 10, 2022 nungi tenzüka election agiba sülen

March 10 nü votes azüngtsü.

Uttar Pradesh nung shilem tenet lemsar election agitsü aser Punjab, Goa o Uttarakhand nungbo February 14 nü agitsü, ta ECI-i metetdaksü.

Manipur nung shilem ana-February 27 aser March 3 nung election agitsü.

State pungu nung Assembly constituency ajak agi 690 lir. UP nung menden 403, Punjab nung 117, Uttarakhand nung 70, Manipur nung 60 aser Goa nung 40 lir.

"Mapang shitak nung election agibaji democracy nung sorkar ketdangsübaren meraksai ayuba lir" ta Election Commission-i ashi.

Linük nung COVID-19 kanga putetba mapang ka süika ECI-i Union Health Secretary aser Home Secretary, experts aser state pungu nung health secretary tem den asüngdangtepa sülen telemtetba agi.

January 15, 2022 tashi COVID nungi jenbua alitsü atema physical rally tem noktangtsü, ta ECI-isa metetdaksüogo.

## 16-Pfutsero A/C nung alo metsü lemtsü



**Kohima, Aenjeti/January 8 (TYO):** 16-Pfutsero Assembly Constituency nung aluyimba maparen atema teyari agütsüba nung shilem ka ama Minister for Planning & Coordination, Land Revenue and Parliamentary Affairs Neiba Kronu-i tanü LADF 2021-22 ajanga aluyimertem nem alo (potato)

metsü lemtsüogo. Metsü lemtsüba sentong ya NDPP 16th Pfutsero A/C tir Dingulo Khutsoh lenisüba nung agi aser sentong minister medentetba yong Minister Welete Kapfo indang PS-i metsü lemja liasü. Kasa mapang nung Kapfo-i, LADF ajanga taoba mapang

aluyimertem nem Coffee aser tajangzük aketba süngtongtem minister-i teyari agütsüba indang lemsatop. Sentong nung Tsüngrem temoatsü meshia Pastor Wekulo K. Mero-i sarasadem aser sentong tatemi Pfutsero Town Baptist Church Deacon, Pfulo Mero-i sarasadema liasü.

## Nagaland CM-i arrtsü nung Naga nungertem kümzüka toktsütsü mepeshi

**Dimapur, Aenjeti/January 8 (TYO):** Karbi Anglong den arrtsü nung aliba aser talisa Balijan 'C' Khan Basti nung alirtem mintoktsü atema Karbi Anglong Autonomous Council (KAAC)-i tetuyuba agütsüba dak sendakba nung Nagaland Chief Minister-i Assam Chief Minister Himanta dangi shiti ka züluogo.

Shiti nung Nagaland CM-i, "Balijan 'C' Khan Basti nung aliba Naga nungertemi asür Hazi Manigul Khan, shiba iba yimtsüing 1910 küm amenok, pa nungi jakzükertem ket nungi ali alia aliba osang ni angazükogo, aser idakji aliba Naga nungertemi parnok talidak ki,

shishilembadak ki aser tekülemdak yanglur lidar, koba küm aika parnok meyong süa aruogo. Iba tesem nung alirtem timba sorkar mapa nungi anener alirtem lir, shirnoki parnok taküm tepeyong bendenba rongsen ajak ki yangluba nung intokogo. Parnok ya Karbi Anglong Autonomous Council, Assam temzüing ozüing kübok tashi angaa anidakba lisopurtem lir aser parnok aika Assam indang Ration Card, Job Card aser Assam sorkari agütsüba Electricity agirtem lir. Parnok tenüngtem ya Election Commission of India indang Electoral Roll nunga züngoksema lir," ta shia lir.

"Parnok mintoktsü merangba ya tim masü. Parnok ki aser ali makai akümtsü aser iba ajanga timtem tekangshi tulu nung toktsüba dang masü tekolok shisatsü dena mesüingjemteti kümdaktsütsü aser iba den ano temzüing ozüing dak sendakba nung tebilemtsü adoktsü akok.

"Anungji kidanger state ana tsüingda tesendaktep tajung aliba tanüla benoka Karbi Anglong nung aliba Naga nung indang ki ojentem kümzüka ayutsü atema jenjang tapet agitsü mepeshir," ta Nagaland CM-isa kasa shit nung temepeshiba ka agütsüogo.

## Mizoram nung school tem January 31 tashi shibanger

**Aizawl, Aenjeti/January 8 (Agencies):** Mizoram nung class 1 nungi 9 tashi aser class 11 shibanga atatsü telemtetba agiogo. State nung COVID-19 tashidak menar timba akümba aser 'Omicron' variant kanga kara prokshia aotsü ana nung aliba reprangteta iba jenjang agiogo.

Hokolbarnü tetuyuba tasen agütsüba nung ashiba agi, class 1 nungi 9 tashi aser class 11 nung azüingertem atema school aser hostel tem Aizawl Municipal Corporation (AMC) area aser state kübok tanga tesemtem nung shibanga atatsü.

Item class nung azüingertem online ajanga tangazükba agütsütsü, ta kasa sangdong nung shia lir.

College aser higher education Institutes aser Universities tem atema class tema online ajanga dang agitsü.

Ajisüaka class 10 aser 12 nung azünger shirnok taküm board tatidang agütsütsü lir, parnok atema school aser hostel tem maneni lapoka toktsütsü, ta metetdaksüogo.

School education department-i, tesayurtem aser school nung tanga ketdangsürtem ajak nem vaccine dose anaprongla agütsütsü atema anepalutsü, ta sangdong ajangsa metetdaksü. Training institutes tem nung mapang ka nung kaketshir tesadang dang angazükdaksütsü melatsü.

Taoba küm April ita nungi tenzüka AMC nung class 1 nungi 9 tashi nung azükertem atema school aser hostel tem shibanga lir, saka tanga tesemtem nungbo taoba küm August ita 15 nü nungi school aser hostel tem lapokshitsü temelaba agütsür liasü.

Colleges tema AMC adena orr aliba tanga tesemtem nung taoba küm September ita nungi tanaben lapokshir liasü.

Tetuyuba tasenba koba January 8 nungi tenzüka January 31 tashi benoktsü, iba tetuyuba kübok state ajunga nung aonung tekülem sentep agitsü memelar aser anungdanga tekülemdak nüburtem tesadang dang melatsü.

Tekülemdak aser lokti sendentem nung ken atentsü asoshi maneni memelatsü, ta sangdong ajanga metetdaksü.

Maneni AMC area nung picnic spot, movie theatre, public park, swimming pool, gymnasium aser beauty parlour tem lapoktsü memelatsü.

Matamabensartertem aser mashisa aliba tetsürtem office-i marui kidang nungi dang mapa inyaktsü temelaba agütsüogo.

Tetuyuba tasen magütsü tashi minister tem yimjak nung osangbenertem den sensasemba nokdanga atar, ta tetuyuba nung shia lir.

Mizoram nung Hokolbarnü nisung 579 dak COVID-19 tashidak potetba sülen tashidak menar ajak senteper nisung 1,43,772 jungogo aser tashidak agi asür 555 jungogo, ta ketdangsür kati ashi.

Mizoram nung tang nisung 2,767 tashidak agi tonger temang anepaludar aser Hokolbarnü nisung 250 taneptsü anguba sülen taneptsü angur ajak senteper nisung 1,40,450 jungogo, ta ketdangsürisa metetdaksü.

## Nagaland sorkari War Room tanaben amenokshir

**Dimapur, Aenjeti/January 8 (TYO):** Linük nung COVID-19 wave tasembuba tenzüka temulungdang yur COVID-19 dak sendakba nung State Level War Room tanaben amenokshio. Chief Secretary & aser Nagaland State Disaster Management Authority, (NSDMA) State Executive Committee, mendenbuba tekolak ser department tongtibangtem nungi ketdangsürtemi War Room achaayangtsü.

State Level War Room yagi state nung COVID-19 den raraba mapang ajak nem tetuyuba kasasa agütsütsü atema achaayangtsü. Maneni iba room ajanga COVID-19 tashidak prokshia aoba nokdangtsü atema department/official/agency tem nem mapang shidak nung tapet osang agütsütsü. Parnokisa nungdakba mapang nung health infrastructure akangshitsü aser COVID-19 agi shirangertem anepalutsü atema tenüngdakba jenjangtem agitsü.

State Level War Room ya Nagaland Civil Secretariat, Kohima kübok Chief Secretary indang Conference Hall nung amenoker inyaksangshitsü.

COVID-19 wara atema State Level War Room Core committee züngsemtem yamai alitsü:

1. J Alam, Chief Secretary :Chairman
2. T. John Longkumer, DGP :Member
3. Sentiyanger, ACS & FC :Member
4. A.S. Bhatia, Principal Secretary, H&FW: Member
5. E. Mhonbemo Patton, Principal Secretary PHED :Member
6. Abhjit Sinha, Home C o m m i s s i o n e r :Member
7. Rovilatuo Mor, Commissioner, Nagaland :Member
8. Kesonyu Yhome, Secretary Finance :Member
9. Lhouchalie Viya, Secretary, NSDMA, Home: Member
10. Dr. Neikhrielie Khimiao, Principal Director, H&FW :Member
11. Medozhalie Pienyu, Dy. Comdt General, HG&CD :Member

Core committee nem teyari agütsütsü atema State Level War Room den sendaktepa inyaktsü asoshi ketdangsürtem yamai alitsü:

1. Shanavas C. Principal Director, School Education.

2. Manoj Kumar, SP(Crime)
3. Sachin Jaiswal, Jt. Secretary, Agriculture.
4. Ajit Kumar Ranjan, Jt. Secretary, H&FW.
5. Johnny Ruangmei, OSD, NSDMA, Home.
6. Dr. Nyan Kikon, SNO, IDSP, H&FW.
7. Nchumbemo Lotha, Dy. Secretary, Home
8. Er. Namang Sepong Chang, Dy. Secretary to Chief Secretary.
9. Veneikho Tetsuo. Assistant Commissioner (HQ)
10. M. Rollan Lotha, COO, NSRLM, RD.
11. Er. Daniel Krocha, Deputy Director, IT&C.
12. Rendemo Shitio, Asstt Manager (Resp & Com), NSDMA.
13. Dr. Longri Kichu, Consultant, H&FW.
14. Nongozo Rikha, Asstt Director, IPR
15. Er. Yanger Longkumer, Program Officer, IT & C
16. Kozo Lasuh, UDA, School Education.
17. Lumdemo Kikon, UDA, School Education.
18. Kezeneilhou Mhasi. Asstt Program Officer, IT&C
19. Bojivie Kevichu, Technical Asstt, IT&C
20. Kumughato G Chophy, Asstt Program Officer, IT
21. Kenedy, SA Tribal Affairs.
22. Enyuh Phom, SA SAB-A Home
23. Imoliba, SA, P&AR|
24. Akummeren Jamir, Information Assistant, IPR
25. Wepre Wetsah, Asstt Geologist, NSDMA |
26. Dr. Hinotoli V Sema, Sr. Consultant, NSDMA.
27. Kevingulie Kiewhuo, Consultant, NSDMA
28. Tsapithong, Statistical Inspector, NSDMA

29. COVID-19 wara dak sendakba nung teyari balala asoshi item number tem nung tongteprateptetsü: (a) +91 89294 07417 (24x7 Helpline) (b) State Level War Room phone numbers: 0370 2270033 0370 2270010

e m a i l : warroomnagaland@gmail.com (c) State Emergency Operation Centre (SEOC) NSDMA, Home Department. 0370-2291122/2291120 Toll tree No. 1070 email: seoc.nsdma@gmail.com

## SRSU 21buba Annual General Conference tembangogo

**Dimapur, Aenjeti/January 8 (TYO):** Sakipheto Range Students' Union 21buba General Conference January 3 nungi 5 tashi agiogo. Iba sentong ya "Visionary Student" omen nung ajemdaker agia liasü.

Conference ya tir Vikavi Zhimomi lenisüba nung agi aser unit tenet nungi delegate 600 dak temai shilem agia liasü.

Conference lapokba sentong nung Western Sumi Hoho, tir Shikaho Zhimomi alakteta jaoker liasü. Mezüingbuba sentong nung o jembiba mapang Zhimomi-i, kaketshirtem dang parnoki jangraba nükjidong tongtettsü atema tali rangloker bendanga agüja maneni inyaktsü ajungshi. Paisa lokti nung kaketshir shia shilem koda tongtibang aser taküm nung jenjang temaba tongtettsü atema meranga inyaktsü koda tongtibang iba indang lemsatapa liasü.

Conference nung o jembirtem

rongnung NGO Helping Hand, New Delhi, indang Gurgaon, Haryana aser Nagaland I/c Abel Naga Achumi, SDO(civil) Medziphema Tokai V. Sumi, Sumi Kiphimi Kughakulu tir Hutoshes Kits aser Sakipheto Baptist Church Pastor Kahoto Zhimomi nung densema lir.

Maneni Western Sumi Students' Union tir A. Kughato Achumi, Chakhroma Students' Union tir V. Akieto Khro aser Sakipheto Area Youth Front tir Kakishie Achumi nungeri salem osang lemsatapa liasü.

Anogo asem tsüingda saisapong, sobaliba inyakyim aser literary tetoktepa balala ayongzüka agi aser takok tajung anguba kaketshirtem nem tetushi agüja liasü.

Tetoktepa ya Zhuikhu Students' Union-i akok aser Medziphema Sumi Students' Union nem best disciplined unit naroküm agütsü.

Nimatighat rong lendong nung asür kinunger nem 'appointment letters' agütsü



Chief Minister Himanta Biswa Sarma-i asür kinungertem nem appointment letters agütsüba noksa nung angur.

**Guwahati, January 8, 2022 (Agencies):** Brahmaputra nung Nimatighat rong meküpokba lendong nung asür kinungertem nem appointment letters agütsüogo.

Chief Minister Himanta Biswa Sarma-i asür kinungertem nem appointment letters agütsü.

September 8, 2021 nü Majuli-i aoba Nimatighat rong meküpokdang nisung asem taküm sama aser 89 kümzüka liasü.

Iba lendong nung Parimita Das, Indreswar Bora aser Dr Bikramjit Baruah nung taküm sama.

Iba tatalokba sülen State

Cabinet-i December 10 nü senden amendang tasür kinunger nem sorkar mapa agütsütsü telemtetba agia liasü.

Tanü Chief Minister Sarma-i asür Parimaita Das tenu Madhumita Das aser asür Indreswar Bora kinungtsü Ruprekha Bora Senapati na nem appointment letters agütsü.

Madhumita Das nem SCERT nung Assistant Professor aser Ruprekha Bora Senapati nem par district nung Grade IV mapa agütsü.

Dr Bikramjit Baruah ya sorkar mozü ki ka nung doctor inyaka liasü aser iba jagi pa mapa nungi sodi anguba

mapang tashi par kibong nem itasen ajunga agütsütsü.

"Meimchir taküm samaba atema sasaba aser kinungertem aria bilemstüba sayua sorkari iba telemtetba agi" ta Chief Minister Sarma-i ashi.

Paisa Education Department dang Finance department den yaritepa mapa nung nisung tasen shimoker nem mapang shitak nung itasen agütsütsü tetuyuba agütsü.

Dr Bikramjit Baruah'er kibong nem itasen agütsüba den külemi parnoki senotsü nüngdakra sorkari yaritsü ta Chief Minister Sarma-isa metetdaksü.

BJP MLA-i Trinamool lennir tepsetertem merenshitsü akhanger

**Agartala, January 8, 2022 (Agencies):** Yaküm August ita Trinamool Congress lennir Mujibur Islam Majumdar amakertem anema IPC Section 302 (murder) benoktsüla ta taoba Tripura minister aser BJP nung temolung masüba MLA Sudip Roy Barman-i takhangba agütsüogo.

Majumdar ya SSKM hospital, Kolkata nung anepalua aru aser Bodbarne pa asü.

Majumdar ya tepset anungji pa tepsetertem anema IPC indang Section 302 benoktsüla ta Barman-i ashi.

Barman den ano BJP nung temolung masüba MLA Ashis Kumar Saha nati Badarghat nung Majumdar'er kinungertem den ajurutepogo.

"August 28 nü Majumdar dak azükba sülen nisungtemi pa ali nung laodaktsü aser teku nung ajem. Ni tanur asüidang nungi Majumdar meteta liasü" ta Barman-isa metetdaksü.

Iba lendong nung Majumdar teka aser tetsüing kanga mejungi yiru.

"Arishi küm 56 tain Majumdar ya BJP züngsemtemi kanga mejungi amak. Yaküm

August 28 nü Trinamool Chhatra Parishad indang Foundation Day nung shilem agitsü atema aodang Majumdar amak" ta Trinamool Congress-i tai tongloktsüogo.

"Majumdar ya Kolkata nung aliba SSKM hospital-i anir ao aser idakji anepalu saka pa Bodbarne asü. Onoki Majumdar atema temeten meshir" ta TMC-i metetdaksü.

Majumdar ya taoba NSUI Tripura unit indang President liasü aser pai yaküm Congress lennir aika den Trinamool nung aden.

Amara Bangali-i Supreme Court nung Manipur anema PIL benok



**Guwahati, January 8, 2022 (Agencies):** Manipur nung Inner Line Permit System (ILPS) mapa tenzükba anema West Bengal nung amenoka aliba Amara Bangali teloki Supreme Court nung ken o benokogo.

SC-i iba PIL agizükogo aser Manipur sorkar dang affidavit agütsütsü tetuyuba agütsü.

"Supreme Court nung Amara Bangali telok den tokteptsü atema sorkari mapa ajak renemogo" ta Manipur Chief Minister N. Biren Singh-i ashi.

ILPS ya Mizoram, Nagaland aser Arunachal Pradesh nung inyaka arur.

January 7 nü kaketshir telok pezü- AMSU, MSF, KSA aser SUK lennirtemi Imphal nung

Amara Bangali aija lungkak aitba sentong ka ayonga agiogo.

Amara Bangali ya Northeast nung Bengali nung kümzüka ayutsü atema tetetba telok ka lir.

Manipur nung kaketshir lennirtemi Amara Bangali general secretary Bakul Chandra Roy mesüka yanglur rongdok aser iba mapang police-i kaketshir lennir kar apu.

"ILPS anema PIL benokbaji tesasatsüka lir" ta Joint Committee of the ILPS indang convener Challamba-i ashi.

"Iba PIL meyipa magi tashi onoki ozüing melaba ama lungkak aittsü aser police-i pua aliba kaketshir lennirtem chiochtsü akhanger" ta Challamba-isa metetdaksü.

Japukong Kaketshir Mungdang Platinum Jubilee Sentong

Anogo :- 13<sup>th</sup> -14<sup>th</sup> Jan 2022

Tesentepdak :- Yajang 'A'

Nukjidang: "Terenlok Aser Tejakleni"



Omen: "Rangben Ranglok" (Holistic Vision)

75 BUBA

JAPUKONG KAKETSHIR MUNG DANG

Chief Host

Shri, Temjen Imna Along Longkumer  
Hon'ble Minister,  
Higher Education & Tribal Affairs.  
Nagaland : Kohima .

Alaketa Tejaoker

Shri Tongpang Ozüküm  
Hon'ble Minister,  
Housing & Mechanical  
Nagaland : Kohima .

Tongti O Fembir

1. Rev. C. Wati Longchar  
Secretary Finance & Property  
ABAM Impur  
2. Imtjungla Longchar.  
Author & Educator Dimapur.

Jubilee Choir

Yajang "A" Kaketshir Telongjem

N.B :

Japukong Kaketshir Mungdang Platinum Jubilee Sentong nung adentsü atema tesüiba JKM ketdangpurtem aser seniorstem ajak pelashishia jaoker.



Assam nungi internet celebrity Dimpu Baruah indang YouTube channel nung 2 million subscribers kuma otsü tasen ka yangluogo. Baruah indang 'Dimpu's Vlogs' ya Assam nung YouTube channel tulutiba lir aser pai "Hey dosto" olen kanga jembir. (Guwahati, January 8)



## TIR YIMYIM YIMOBILEM (EDITORIAL)

DIMAPUR AMUNGNÜ, AENJETI (JANUARY) 09, 2022

### Bilemtedaktsütsü timtemdaktsüba

**A**senok taküm nung lendong timtem ajuruba ajakbo temerenshi masütsüa akok saka timtem tia karbo Tsüngrem temeim nungi asenok mepilatsü atema Tsüngremi asen taküm nung inyaker asütsüa akok. Paul temulung memeyipi Saul asüba mapang, pai pa yimsü nung akanga amangba aser Tsüngrem tsüngdang indangindanga aliba nisung ama bilem. Ajisüaka, shitakba nungbo pa takümji Tsüngrem taochi memeteti nemzüba nisung ka dang liasü. Pai Tsüngrem peladaktsütsü ta bilema Khristan purtem pua reshikangshibaji, shitakba nungbo Tsüngrem jashidaktsüba mapa ka liasü. Pai repranga lia tenyar Stephen long agi onseta sädaktsü aser ano pa temulungjang temerangba küma tanungba Khristan purtem pua reshikangshitsü apuso. Tasen Laishiba nung Yisu Khrista temeim kuliser long agi onseta sädaktsüba nisung ana dang lir. Anaji ka Stephen aser tangabaji Paul lir. Iba tatalokbatemji kodang medemdanga bilemdangdir, Tsüngremi tenyar Paul-a pai ngua onseta sädaktsüba Stephen amato onseta sädaktsütsüa inyaker asü ta bilemetsüa asenoki azünger. Tsüngrem sentongji asenoki memetet saka Stephen ama Paul-a kasa tia nung asütsüa atalokba nungji, asenok akümlirtem atema tangazüktsü tanüla lesson tuluka angur. Atangji, Tsüngremi Saul nem taidok agütsü aser tenünga dena Paul melentsü, anungji pa taküm nung lendong timtem aiben ajuruba jagi pa temulung jungjunga memeyipba agi Tsüngremi merenshir ta masü saka pa temulung temerang aser asüküm shisatsü bener Khristan-tem reshikangshiba mapa tamajung patekato aser paikato inyakbatemtobo Tsüngremibo tai dokogo ta pa mulung ulushidaktsütsü aser tasü itdaktsütsü atema bilemdaktetsüba mapa ka liasü ta asenoki angatetter. Aji oda, Yisu Khrista temeim osang tajung indang sayutsüngia jajaba atema Yihuda nungertemi long agi onseta sädaktsüoggo ta aser yutsüba nungi masü kümtetba nisungji Paul liasü ta asenoki Tenyar Mapa 14:19 nung angur. Iba ama timtem aser reshikangshiji jagi pa temulung memeyipdang pai Khristan-tem anema inyakba mapatem bilemtedakja meinyak asübo, ashiko pai pasasa Tsüngrem tashi amadoker, paang ulula ta 2 Korint tapu 12 azüngdang asenoki ngateter. Tenyar Paul-i kasa Korint tapu nung 'ni kanga alia moulutsü atema, kü nem shi nung ai ka agütsü aser ni kanga alia moulutsüa kü dak azüktsüa Satan nungi tenyar ka kü nem agütsü,' ta shia aliba ai aser Satan-ji pa dak long agi aonba timtem aser tekangshitemji liasü. Iba Lai tapu ya azüngdang, aya ! Tsüngrem tenzükertema tamang nung akangshitsü atema Satan nungi tenyar dena yoker na (?) ta bilemdangtsüa azünger. Ashiko, asenok dak tamajung atalokbatem ya Tsüngremi meteta Pa nükjidong ka yur ataloker saka tamajungjibo Satan nem dang inyakdaktsü ta angatetdaktsüner südi. Ibaji kodang Paul-i angatet, " ni asoshiho taküm alibaji Khrista aser tasüba tajangzük," ta tasü itta ashiba asenoki Filipi 1:21 nung angur. Paul ama ka dak timtem lendong atalokba jagi, tanüa, asenok dang asen taküm nung Tsüngrem anema inyakba taa meyi pa angutsüba indang ashir asütsüa akok. Atangji, asen Tsüngrem ya temeim aser ochi Tsüngrem, anungji Pai asenok kanga meimer aser tai adoker, saka asenoki Pa anema inyakba taitem den masadangi meimba Pa taochi indang bilemtetsü atema asen shi nung Pai ai ka agütsütsüa akok. Shibaibo pei taküm nung timtem lendong ajurunütsü aser timtem bener Tsüngrem mapa inyaka jajanütsü ? Iba jagiang, Paul-ia pa shi nung ai alibaji endokjang ta asemben tashi Tsüngrem dang mepishi, saka Tsüngremi pa dang " Kü taochi na asoshi teperi," ta dang ashiba kasa 2 Korint 12 nung angur. Kodang asen taküm nunga timtem lendong ajurudir, timtemji masü saka asen taküm nung Tsüngremi inyakba taochi mapatem indang shisadangi aser mapang ajak nung Tsüngrem nem tenüngsang agüja lidi.

## OLEMSABANG

2022 küm sorkar, yimten aser arogo sentong koda renemer...???

~ L. Kika Pongener.

2021 küm suite ma oadokogo, aser joko küm tasen ka nung asenok ayaokogo. Aji oda, küm tasen ka nung ayaokdang nisung ajak mulungjang nung iba küm tasenba nungji kü taküm, ozü kibong, ozü yimten, ozü arogo, ozü telok aser tongtipangsa ozü state sorkar-a koda ka lia aotsü ??? Mesura teinyaktsü sentongtem kechisa asütsü ???...ta tamasa nisung ajak mulungjang nung shisadanga alitsü sudi. Kodang asenoki tarutsü atema sentongtem yanglutsü tenzükdir, idangji tamasa tesuiba mapatem khen meyi pa reprangshitsüa akümer, kechiyong tesuiba mapatem meyi pa mereprangdangi sentong tasentemji koda-kang meyanglur. Anungji 2022 küm asoshi asen Naga nung yimten, arogo, loktiliba aser sorkar inyaka aotsü sentong tasenji medenzükdang, tamasa tesuiba küm tatalokbatem khen meyi pa reprangdangi. Taoba küm inyakba nung tashishitsü kar lira taküm 2022 küm tajungba melenshir inyaktsü tenzükdir.

Sorkar inyakyim aser Naga nung nuchiso telemtetba : 2021 küm asen Naga lima sorkar nung otsü-sutsü mapa ka atalokogo. Ibaji kechi otsü-sutsü mapa ka atalok (?)...ta sura, 'Opposition' maliba sorkar ka küma rulling o opposition na ka küma loktep. Aser ibaji kechi nungdem nung ka küma loktep ta sura, asen Naga nung yimten tebilemetsü tatemtang telemtetba (Solution) kati arutsü atema Assembly nung 'Tatar'-temi lenmang sadema lapoka yutsü ta nubur dang sangdong. Anungji tang nuburtem ajak mulungjang nung tasüngdangba ka agi sunga alibaji...Surabangla ibaji mapa küma inyaktetdi ma...??? Kechiyong election agiba shia party ajunga manifesto nung tamasa Naga nung nuchiso bushiba mapa ya tatemtang telemtetba ka dangi bentsü arutsü ta nangzüktsü...Saka election kwiben agir suite ma oadokogo, saka tanü tashi kecha telemtetba ka dangi maruteti lir...!!!??? Küm shia kodang Christmas mongpu tonga arudir Naga nung Solution-ji Christmas senpet ama agutsütsü ta nangzüktsü, saka Christmas-a kwika suite ma oadokogo...!!!??? 2021 küma Naga nung Solution-ji Christmas senpet amai agutsütsü ta angazük, saka 2021 Christmas-a suite ma oadokogo. Ano tang Naga nung 'Solution'-ji New Year senpet amai agutsütsü ta angazük, anungji nuburtem ajunga tenarong meronger osangji angashitsü yongyasetatadagi. Surabangla aji asangsang nung mapa küma ataloktsü asü mataloktsü...??? Ano tip külen linuk tenzükertema asen Naga nung Solution-ji teküraba nung tatemtang kati arutsü atema 'Faction' ajunga longjemer inyaktsü sudi...ta nuburtem teyongyaba tulu nung ata-a alinung, ano Faction-ang talila ka razüka oa tenzüka osang ngua nuburtem kanga sungmangteper...!!! Surabangla iba ya kong koda tempangtsü (?)...ta nuburtem ajunga tatemtang telangzüba ka monguteti ratamata tia nung lir...!!! Kechiyong asen Naga nung sorkar aser linuk tenzüker inyakyim ya jungjunga shisadanga, kanga teratatsü ka lir...!!! Tebong ka küma longjemer nokdak nungdang takok angutsüba-purtembo telemsa-ang lemsar...!!! Ano meloktepi balala alinungdang linuk terenlok shitak inyaktsü aser nubur-a ajangzüktsü ta asüba-purtembo ka küma lokteper...!!! Tanü asen Naga lima tia iba jenjang nungji lir. Anungji tang Naga nung nubur ajunga taginubaji nangzükba ama Naga nung yimten ken o (Solution) ya asangsang nung 2022 kümba tatemtang kati arutetsü asü marutetsü (?)...ta nuburtem ajunga yongya-a atadagi. Aji oda, nubur dang sangdongba amaji asangsang nung mapa küma meinyaktetra, 'Solution' tenung atemer rulling o opposition na loktepbaji nubur mesushiba mapa ka dang asütsü, oda taruba 2023 State General Election nung lokteper tokteptsüba (Alliance) aser lokteper sorkar akümtsüba (Coalition) jilia renemshiba mapa ka dang asütsü. Ajak dak alaka, tang nuburtemi sorkar nungi yimlabaji/taginubaji joko sorkar inyakyim nung tsüngsu apur/aibelenba tuteta metongshitsü 'Opposition' maliji kecha tetsübu/tarentak makai nubur meyi pa rongsenji sadem-sadema amshitsü mebilemi/memerangi, nubur meima asen lima renloktsü asoshi ochishia ketdang sua inyaktsüla. Tongtipangsa Center sorkari senotsübo peria agutsü sernung kechi Project-sa tanü tashi merenemi anendaka lir, itemji teküratiba nung renema inyaktsüla. Ano kanga tongtipang kaji 'Foot Hill Road' Assam lima majangi asen Naga litsü nung jajatsüba lenmang ya 2022 küm tatemlenbo Gari tilabo ayungayunga jajattettsüa renemtettsü kanga meranga inyaktsüla, talisa sorkar-ia senotsü peria agutsütsüla aser Contractor-ia mapaji metitemi meranga ochishia inyaktsüla.

Nuburi sorkar nem inyakdaktsünuba kar : Nuburi sorkar nem kanga tongtipang sua inyakdaktsünubaji, 2020 & 2021 küm Corona wara agi alima ajunga Lockdown sur talisa tanü poksung aayanga alir kibongtem aika sensak tia nung lir . Ano lanur zünger mapa makartem (Educated un-empolyed youth) Assam-India lima nung prokshia Company mapa balala nung inyaka aliba teimba ka meyi pa arur asen lima nung mapa kecha maka, pei tsürabur nem timtem khuret aguja lidagi. Itemji lia lia tsürabur kija khuret masü yimten, arogo aser sorkar khuret akümtsü. Anungji sorkari item tanü poksung aayanga alirtem aser lanur zünger mapa makartem atema 'Special Scheme' kar lapoka teyari lenmang kar danga mejetteta inyaktsüla. Ano Constituency shia nung MLA-temi 'LADP' Fund nungi shilem kar agiteter item lanurtem aser tanü poksung aayanga alir kibongtem atema teyari lenmang karbosa inyaktsüla. Tatishitsü agi...Shiruru metsütsü/Farming/small scale Industry/handloom/handicraft/blacksmith/carpentry etc. yamala mapa tenzüka inyaktsüa teyari (loan/subsidy) kar danga agutsüra, ibajagi aayangertem aser lanur mapa makar atema tajangzük tulu asütsü.

Yimtsüng nung yimten aser arogo-i inyaktsü mapa kar : Yimtsüng shia nung Village Council-i anir Village Development Board-i MNREGA Fund aruba nungi Lockdown mapang lanur pei limai meyi pa arur kecha mapa maka alirtem aser tanü poksung aayanga alir kibongtem atema parnok sen aatsüa/aayangtsüa mapa karbosa inyaktsüla. Ano iba ya sorkar aser yimten yimsusur khuret dang masü arok khuret ta angateta, arogo tulu/takar arogo karibo item lanurtem aser sensaker aayanger kibongtem atema teyari (Relief) mapa kar danga inyaktetra kanga ajungtsü, kechiyong taoba 2020 & 2021 küm ana tetsüngda nung alima kangasa sensak tiai yiogo. Anungji iba atema sorkar, yimten, arogo aser loktiliba ajungai khuret bena mapa karbosa inyaktsü kangasa nungdaka lir ta ajitetba nuburtem den lemsateper.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Tan ita nungi 'The Chosen' Season tasembuba tangoktsü



**January 08, 2022:** Laishiba nung ajemdaker adokba series 'The Chosen' season tasembuba tangoktsü, ta iba series yanglurtemi social media accounts ajanga metetdaksü.

The Chosen series ajanga ano maneni season ka tangoktsü atema sen peria bendentetogo, aser tan ita nungi season tasenba tangoktsü.

The Chosen ya mezüing 2017 küm tenzüka liasü. The Chosen mezüingbuba season television series nung Yisu Khrista aser Pa nütsüngtem indang otsü shia lir. Iba ya The Chosen app nung angati reprangteter.

Parnok indang Twitter page ajanga, "Season 3 atema senotsü peria lir aser onoki Januray ita nungi 'pre-production' tenzüksü. Seasons aser episodes tasen adoktetba den külemi sen malirtem nem angati reprangtetedaksüba nung onok yariba atema pelar," ta metetdaksü.

The Chosen series Director aser otsü zülur, Dallas Jenkins-ia pa indang Facebook page ajanga iba osang ya lemsatepa

liasü.

"Onok den partner asüba atema pelar. Shirnokisa pelar'ar meteter ma? Alima tesem ajaklen angati reprangtem ajaki pelar, kechiyong nenoki jelia sen agütsü, aser ibaji ajanga shilem agirtemi maneni episodes aser seasons tasen adokteter," ta Jenkins-i metetdaksü.

The Chosen series ya alima tesem ajungalen million 320 dak tema stream süogo. Yaküm küm tetenzüklen 'Christmas with The Chosen' ta ser film ka sayaa liasü aser ibaji ajanga distributor, Fathom Events-i record tasen aika yanglutetogo.

Jenkins-i The Chosen ya seasons tenet tashi adoktsü nükjidong lir.

The Chosen nung Yisu shilem agisang, Jonathan Roumie-i, The Chosen series ajak nung Yisu taküm otsü sentsüwangshitsür, ta metetdaksü.

The Chosen series takok anguba atema Roumie-i Tsüngrem nem tenüngsang agütsü.

"Iba project nung Temeshi Tanelai mapa inyaka tanela tsütsü nisungtem melungjang nung kongshir, aser ibaji ajanga parnok tamang jenjang asentenshitsür," ta paisa metetdaksü.

"The Chosen" series nung shilem agirtemi "Christmas with The Chosen: The Messengers," film nunga shilem agi, aser iba film ya Fathom indang 'bestselling film' film kümogo.

The Chosen film ticket ayokba nungi dollar sen million 8 yokzük, aser iba film ya Khristmas nungtem nung yangluba film ka lir.

Yaküm November ita nung film distributor- Fathom Events-i, iba film ticket ayok tenzüka sülen mezüingbuba ghonda 12 tsüngda nung dollar sen million 1.5 jenjang ticket yokzüka liasü, ta metetdaksü.

The Chosen Producer, Loaves & Fishes Productions-i season ana yanglu aser oshi 50 nung meyipzüka liasü. Item series ya iOS aser Android app stores nunga angati reprangtetsü.

## ANO GO ABEN TSÜNGREM DEN

### MULUNGTET TASHI NUNG AGÜJANG

"Nisung shia Kechi koda pei temulung nung mulungtet aji oda agüjang; saka nungnanga masü, kangshia masü, kechiaser Tsüngremi pelashishia agütsüba meimer". 2 Korint 9:7

Agütsüba ya tamasa Tsüngremi kotak nung tenzüka, anungji, asenok asoshi teinyaktsü tongtibangbaji, Tsüngrem nem asen taküm, rongsen aser sempet agütsütsüba lir. Merk 12: 41-44 nung amitsür kati tenla agütsüba nungji asenoki tabensaba nung agütsüba tatishtsüji angur. Tangarbo parnok akaba rongsen nungi agütsü. Kechiaser tangarbo parnok jenti akaba rongsen nungi agütsü saka laibo la makaba nungi la akaba ajak mulungsentsü taroktiba nungi agütsü. Amitsürla-i agütsüba ya tabensaba nung agütsü kechiaser: lai mulungsoa agütsü, lai tashi anga agütsü, lai la akaba ajak Tsüngrem nem bendanga agütsü. Asen taküm, sempet aser rongsen jenti mesüaka, Tsüngrem nem temulungtetba shitak agi agütsüra, asenoki tenla agütsüba jagi Tsüngremi mapa tulu inyaktetsü. Martin Lutheri yamai ashi, 'ni kü teka nung oset/langka ayutsüba merang, ajak sama; saka Tsüngrem teka nung kechi agütsü ajak ano kar'.

### SARASADEM

Kibuba Yisu, onok taküm rangben agi Ne nem agütsüba tanela lesson sayu nung Ne nem tenüngsang agütsür. Amen

## Bible Project-i Laishiba azüingba nung yarisemba app sayatsü

**January 08, 2022:** Tesüiba yaritsü melungteta liasü. küm aika Bible Project-i You Tube ajanga nisung million aika den Yisu Khrista osangtajung lemsatepa arur; ano kobi melii parnoki Laishiba azüingba nung yarisemtsü atema app tasen ka tenzüksü.

Education technology company tenzükertemi twitter ajanga, "BibleProject app ajanga onoki Laishiba azüingba nung yarisemtsü. Akhidang otsü angatetsü aser Laishiba azüingtsü atema angazüktsü," ta metetdaksü.

Bible Project tenzüka mapang nungi tenzüka parnoki video aser podcasts noklang aika adokogo aser alima tesem balala nung media channel balala nung nisung million 100 dak temai itemji reprangogo.

Bible project indang app tasenba ya mapang talangka nungi tembar ana- Timothy Mackie aser Jonathan Collins nati tenzüka. Tena ya mezüing Multnomah Bible College nung ajurutepa liasü, aser iba mapang nungjagi tenzüka tenati Laishiba junga angateta azüingtsü atema nüburtem

"Nisungtemi Tejen Lai aser Tesen Lai naprongla zünga junga angatetsüji kanga tongtibang, aser nisung aikati iba app teyari agia Lai azüingtsü ta tenati imlar," ta tawa Bible Project indang website ajanga metetdaksü.

Mackie-i Hebrew Bible junga meteta lir aser Collins-i Laishiba nung onük kanga tasaktem junga meteta lir. The Bible Project app ajanga Laishiba nung tatalokba balala rarateta ashitsü aser Laishiba nung aliba kaket shia omen balala metetdaksütsü.

Iba app den külemi parnoki maneni videos, podcasts aser Bible study adoktsü, koba ajanga nisungtemi Khrista osangtajung junga angatetsü. Website nungsa, "Laishiba Tapu aser tekongtem ka nungi ka ta azüingdang Lai nükjidong angatetsü. Skills tab ajanga Lai azüingtsü merangang. Azüingba tasa angazükang, aser ibaji ajanga Laishiba adokba nükjidong junga rajemtsü," ta metetdaksü.

## Covid ajanga 2022 Christian Grammy Awards sentong thinener



**January 08, 2022:** Tang alima nung coronavirus Omicron variant tali prokba ajanga 64buba Christian Grammy Awards sentong thinenogo; iba sentong ya January 31 nü agitsü liasü.

January 05, 2022 nü Recording Academy-i sangdong ka ajanga, tang ano wara tali prokba nung ajemdaker awards sentong thinener, ta metetdaksü.

Parnoki sangdong ka ajanga, "Yimti aser state nung ketdangsertem aser health

mongintem, kentenertem aser onok partners den shisa lemsatepa sülen Recording Academy aser CBS-i 64buba Annual Grammy Awards Show thinener," ta metetdaksü.

"Kentenertem, sentong reprangertem aser iba sentong takok ngua agitettsü atema meranga inyaker noklang aika taküm kümzüka alitsüji onok atema kanga tongtibang. Tang Omicron variant tensa nung ajemdaker January 31 nü award sentong agitsü alibaji thinentsüsa akümer. Tarutsü anogo ka nung iba sentong ayongzüka agitsü aser iba anogoji kobi melii sangdongtsü," ta parnokisa metetdaksü.

2022 Grammy Awards sentong ya January 31 agitsü ta Billboard-i sangdonga liasü saka COVID-19 Omicron variant nung ajemdaker iba

sentong thinentsü atema jembia aruogo.

2021 küm nunga iba Grammy Awards sentong ya January 31, 2021 nü agitsü liasü saka Los Angeles nung coronavirus kanga prokba ajanga iba sentong atsülanga March 14 nung ang agi.

Christian Grammy Awards nominations timtibaji Bethel Music collective nungi Dave aser Maverick City Music napronglai nominations pongungu ngua lir.

Tekülem aser tetushi kentener, Tauren Wells-i nominations ana angu. Best contemporary Christian music performance/song ("Hold Us Together (Hope Mix)" aser best contemporary Christian music album for Citizen Of Heaven (Live) category nung la nominate asü.


**OLONG PAITEP # 6045**

1		2			3		4			5
				6		7				
8										
						9				
			10							
11										12
					13			14		
15										
16								17		

<b>TIPILEN</b>		<b>LANGTSÜNGLEN</b>	
1. Nüji masü	- (4)	1. Jila tulu	- (5)
3. Technütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anüngdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

**OLONG PAITEP # 6044 TELANGZÜBA**

<b>TIPILEN :</b>		<b>LANGTSÜNGLEN :</b>	
1. Tesangra, 5. Mungo, 7. Kisen,		1. Temesen, 2. Raksa, 3. Aon,	
8. Salem, 12. Semki, 14. Kilem,		4. Aso,	
15. Kensü, 16. Sangpang.		6. Nile, 9. Alizüng, 10. Omen,	
		11. Lemta, 13. Ola, 14. Kin.	



**MOKOKCHUNG TOWN NUNG ALIR ALOKBAR TELOK AO OSHI TAKAR/ SENSAKER TA PANGSENTEPER :**

**Sobangba** : Asen Ao oshi ya kangasa sensaker aja, ya koma asütsü?  
**Alokba** : Aeet ajibo ni hau mahara, asen Ao oshi ya takar nung koda?  
**Sobangba** : Masüaja, nai asen Ao oshi takara ta kodaser shiteter?  
**Alokba** : Sürapangla ni Oren kar shidi nai English mesüra Nagamese agi shidangang no?  
**Sobangba** : Chaaloo!  
**Alokba** : Ni tang Mokokchungi tugutsü, ni tang Ungmai aitsü, ni tang Longkhümi atutsü, ni tang Impuri alutsü. Jo, nai aji English agi benteta orentemji shiangjong.  
**Sobangba** : Ok, Now I'll go to Mokokchung, now I'll go to, waas, hauna, English agibo ajakji Go Go ta dang shiteterji Ao oshisa takarba ya.

Lilir : WhatsApp

**TANÜBO NAI LANGZÜANG**

Q. 'Atacama Large Millimeter/submillimeter Array (ALMA)' ya \_\_\_\_\_ linük nung lir.  
 [A] USA [B] Chile [C] Australia [D] Russia  
 \_\_\_\_\_ (Taruba adok nung onoki langzüsü)  
**YASHI ADOK TELANGZÜBA** : Diphu, Assam

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Luyu**  
 (n) külemi aliba pila ( separated)  
 \* Kibong kümer bala **luyu** masütsü atema aremzükteper.  
**Lüzük**  
 (v) agizük ( taken out)  
 \* Sü ana abena aliba lemiba agi ka **lüzüka** ayu.

**NAI-A YA METETTER MA**

**INDIA NUNG NÜBURTEMI SAPUA ALIBA GARI KAR: DECEMBER 2021'**

OEM	Model	Dec '21 Sales
1. Maruti	Wagon R	19,728
2. Maruti	Swift	15,661
3. Maruti	Baleno	14,458
4. Tata	Nexon	12,899
5. Maruti	Ertiga	11,840
6. Maruti	Alto	11,170
7. Maruti	Dzire	10,633
8. Hyundai	Venue	10,360
9. Maruti	Vitara Brezza	9531
10. Maruti	Eeco	9165
11. Tata	Punch	8008
12. Hyundai	Creta	7609
13. Hyundai	Grand i10 NIOS	6151
14. Maruti	Celerio	5656
15. Mahindra	Bolero	5314
16. Maruti	S-Presso	5150
17. Tata	Altroz	5009
18. Mahindra	XUV300	4260
19. Maruti	XL6	4090
20. Kia	Seltos	4012
21. Toyota	Innova Crysta	3989
22. Mahindra	XUV700	3980
23. Honda	City	3743
24. Tata	Tiago	3675
25. Honda	Amaze	3659

**SUDOKU # 6085**

**TELANGZÜBA # 6084**

	2			7	8	1				9	6	3	2	5	4	7	8	1
8			2		6	4	5			2	7	4	8	3	1	6	5	9
	6	1		3				2		1	5	8	6	9	7	2	3	4
		8		4	5	9		1		3	9	7	5	1	2	8	4	6
7		5	1		9	3		6		4	2	5	9	6	8	3	1	7
2	1					5	4	7		8	1	6	7	4	3	5	9	2
		4						9		5	3	1	4	2	6	9	7	8
9		2								7	4	2	3	8	9	1	6	5
3		6		9	2	7	1	8		6	8	9	1	7	5	4	2	3

**OJANG LUTEP # 5631**

ELETEMNSHI :   
 MAATE :   
 YATENSAYA :   
 AKBALA :   
 RUTSMAÜ :   
 KASA :   
 EIP :   
 AKD :   
 BAULUNGTEMTET :   
 LAITSALÜ :

**OJANG LUTEP TELANGZÜBA # 5630**

LOKTI TEMELNSHI ATEMA AJAKI JEMBR SAKA  
 PEI TAKÜM MELENSHINER MALI

**TAN HOPTA ATEMA - KOMA SÜLA ?**

Q. Naga yimten tebilemtsü ya tatem küma melatettet tashi, Nagaland nung India temzüng kübok agiba election kata magii ata nunga koma süla ?

## State 5 nung Feb. 10 nungi shilem tenet lemsar election agitsü: EC



January 08, 2022 nü New Delhi nung osangbenertem senden ka nung Chief Election Commissioner, Sushil Chandra den Election Commissioner ana- Rajeev Kumar aser Anoop Chandra Pandey nungeri Goa, Punjab, Manipur, Uttarakhand aser Uttar Pradesh state tem nung assembly election agitsü atema anogotem sangdongtsü atema Vigyan Bhavan tonga aruba sülen tangokba noksa nung angur.

**New Delhi, Aenjeti/January 08 (Agencies):** February 10, 2022 nungi tenzuka shilem tenet lemsar state pongu nung assembly election agitsü atema Election Commission of India-i election agitsü anogotem sangdongogo.

Honibarnü Vigyan Bhavan, New Delhi nung osangbenertem senden ka nung Chief Election Commissioner, Sushil Chandra den Election Commissioner ana- Rajeev Kumar aser Anoop Chandra Pandey nungeri Goa, Punjab, Manipur, Uttarakhand aser Uttar Pradesh state tem nung assembly election agitsü anogotem sangdong.

Uttar Pradesh nung assembly menden 403, Punjab nung assembly menden 117, Uttarakhand nung menden 70, Manipur nung menden 60 aser Goa nung assembly menden 40 atema election agitsü anogotem sangdong.

## India nung ano nisung lakh 1.40 dak Covid putet aser 285 asü

**New Delhi, January 08 (Agencies):** India nung ano nisung 1,41,986 dak coronavirus putet aser ibaji yashi (Hokolbar) dang nungi shilem 21 agi timba lir; tang linük nung iba tashidak agi teshirangdakpur 4,72,169 kümogo, ta Honibarnü Union health ministry-i metetdaksü.

Tang India nung Omicron case 3,071 lir aser state 23 nung Covid-19 variant tasenba ya

State pongu nungji tang mezüing vote agütsüsupur lakh 24.9 dak tema lir.

"Covid wara nungi kümzüka alitsü atema junga terenemshia lia state pongu nungji akok tashi voters timtibai shilem agitsü nükjidong yur onoki inyakdar," ta Election Commission-i ashi.

Chief Election Commissioner-isa, February 10 nungi tenzuka March 7 tashi nung state pongu nung shilem tenet lemsar assembly elections agitsü. Iba sülen March 10 nü election osang sangdongtsü, ta metetdaksü.

Punjab, Uttarakhand aser Goa state tem nungbo February 14 kija nung election aitsü, Manipur nung February 27 aser March 3 nü election agitsü aser Uttar Pradesh nung shilem tenet lemsar February 10, 14, 20, 23, 27; March 3 aser March 7 anogotem nung election agitsü.

putetogo. Maharashtra nung Omicron case 876 lir aser Delhi nung case 513 lir.

Linük nung ano coronavirus agi shiranger 285 süogo aser tang tashi nungbo iba tashidak agi shiranger ajak senteper 4,83,463 süogo, ta Honibarnep 9:00 ako nung Ministry-i metetdaksü.

Tang anogo shia coronavirus positive putetba shilem 9.28

Arrshi küm 80 ser tempur teintet sensotem, mata-mabensartem aser coronavirus agi shiranger temi postal ballot ajanga vote agütsütettsü.

State pongu nung tetsür crore 8.5 densema crore 18 dak temai vote agütsüsü temsüa lir.

Polling stations ajak nung sanitizers aser masks densema Covid-mitigation facilities alitsü aser polling booths tali amenoktsü.

"Coronavirus wara nungi kümzüka election agitsü atema health tsütsü mongintem nungi shisa agiogo aser state ponguprongla nung election ghonda ka tali agitsü," ta Election Commission-isa metetdaksüogo.

Iba dak alia yimtenren party tem aser candidate tem dang akok tashi digital mesüra video conferencing ajanga dang election nüboyim sentong agitsü metetdaksüogo.

## BJP anema Cong-i party mashie teyari agitsü melunga lir: P Chidambaram

**Panaji, January 08 (Agencies):** Taruba Goa assembly election nung BJP tamakok ngudaktsütsü atema Congress-i party mashie teyari agitsü melunga lir, ta Honibarnü Congress party lenir tain, P Chidambaram-i metetdaksü.

Trinamool Congress Party nungi Goa desk in-charge, Mahua Moitra-i, Mamata Banerjee-i aniba party-i Goa Forward Party (GFP) aser Congress den lokteper tokteptsü melunga lir, ta sangdongba sülen ghonda ishika dang lirbo Chidambaram-ia BJP anema Congress-i party mashie teyari agitsü melunga lir, ta metetdaksü.

Goa yimtiba, Panaji nung osangbenertem den jembidang taoba mapang Union Minister, Chidambaram-i, "Tanü ni osangkaket nung TMC-i teloktep yanglutsü atema sangdongba züngshiogo, anungji official sangdong ata-a alitsü," ta metetdaksü.

"Congress kijai BJP tamakok ngudaktsütsü koka lir, ajisüaka

BJP tamakok ngudaktsütsü atema party kari danga Congress yaritsü melunga lira, ni magizüktsü asü?" ta Chidambaram-i ashi.

2017 küm assembly menden 40 aliba Goa nung single largest party ji Congress Party liasü (menden 17 tashi nung takok ngua liasü) saka tesüiba küm pongu tsüingda Goa assembly nung Congress züngsem kanga ajema ana dang kümogo.

Congress MLA aika BJP dangi ao aser ana TMC dangi ao, aser ibaji ajanga tang assembly nung Congress MLA ana dang kümogo.

Election jelia Congress-i Goa nung GFP den teloktep yangluogo aser TMC-ia Maharashtrawadi Gomantak Party (MGP) den teloktep yangluogo.

Mahua Moitra-i twitter ajanga, "BJP tamakok ngudaktsütsü atema TMC-i akokba tashi ajak inyaktsü," ta sangdong aser ibaji GFP aser Congress na den-a lemsatapa liasü.



January 08, 2022 nü Hyderabad nung CPI-M party Central Committee senden nung adentsü aser Sitaram Yechuri, P Vijayan aser CPI-M lenirtem aruba noksa nung angur.

## MHA-i Missionaries of Charity nem FCRA registration agütsüogo

**New Delhi, January 08 (Agencies):** Union home ministry-i Foreign Contribution (Regulation) Act, 2010 kübok Missionaries of Charity (MoC) nem tanaben registration agütsüogo, ta Honibarnü osang ka ajanga metetdaksü.

Missionaries of Charity ya Mother Teresa-i Kolkata nung tenzka liasü.

Anogo ishika tejaklen Mother Teresa den sendaktepa aliba melungtet telok kati documents kar agütsüba sülen MHA-i MoC nem registration tanaben agütsür. Iba tetezü tang nungi ano MoC-i bendanglen nungi senotsü teyari agitettsü aser FCRA account nung aliba sen agitettsü.

December 25, 2021 nü home ministry-i FCRA 2010 aser Foreign Contribution Regulation Rules 2011 nung aliba telatetba kar mabensaba agi Missionaries of Charity indang FCRA registration renewal magizüki liasü.

2020-21 nung Missionaries of Charity indang foreign receipts ji sen crore 75 shi liasü,

2019-20 küm sen crore 104 aser 2018-19 küm sen crore 68 liasü.

MHA-i MoC indang FCRA registration renewal magizükba sülen Khristantem, Congress party aser West Bengal chief minister, Mamata Banerjee densema aikati sorkar aitsüogo.

Odisha chief minister Naveen Patnaik-ibo state nung MoC indang institution 13 nungita yaritsü atema chief minister's relief fund nungi sen lakh 79 lemsüktsüogo.

December ita nung Centre sorkari Missionaries of Charity indang bank account ajak shibangja liasü, aser ibaji ajanga bendanglen nungi senotsü teyari magiteti Missionaries of Charity indang rejutem timtemi aitsüa liasü.

Gujarat nung police-i Missionaries of Charity indang orphanage ka anema bushisüingdang tenzük. December 13 nü Gujarat kübok Vadodara yimti nung police-i Missionaries of Charity indang Nirmala Shishu Bhavan shelter home anema bushisüingdanga liasü.



Chennai, January 08, 2022: Chennai nung coronavirus wara kanga prokba nung ajemdaker ketdangsertemi Chennai Trade Centre nung Covid-19 isolation ward amenoka yipten 900 renema aliba noksa nung angur.



Pakistan kübok Murree tesem nung rür tali alaba ajanga garitem mouteti aliba noksa nung angur. Honibarnü raliwalirtem iba tesem nung gari taolen maka akümba sülen nisung ti tashi süogo. Nisungtem ya gari telung nung sü aika abener gari ajunga rür agi nümbangdaksüba ajanga tango moi asüba asütsü ta bilemer.

### Kazakhstan nung Russia nung sepai inyaksangshiba Blinken-i ashishi

**Washington, Aenjeti/ January 8 (Agencies):** US Secretary of State Antony Blinken-i, tang Kazakhstan nung mepetmesü tulu adoka aliba mesemtsü atema Russia indang military teyari meshiba atema ashishiogo.

Totzü jenjang tali akümba ajanga nüburtemi longka aiba mapang nisung aika süogo, saka Blinken-i ashiba agi, Kazakh sorkari iba longkak aiba yabo aziüoktetsü ta US-i bilemer.

Pai osangbenertem dang ashiba agi, kechiba Russia nung sepai yoker aji mejangja.

Russia-i aniba sepai 2500 Kazakhstan tongaogo.

Moscow nung ketdangsürtemi ashiba agi, sepaitem ya Collective Security Treaty Organization (CSTO) tawabangba kübok yokogo aser khen atema dang lir. CSTO ya taoba Soviet republics pongu aser Russia-i tentetba Eurasian military alliance ka lir.

Longkak aitertemi Kazakhstan nung yimti tulutiba Almaty nung mayor office aser yimti indang airport amakba sülen tir Kassym-Jomart Tokayev-i teyari meshia liasü.

Ajisüaka osangbenertem den sensaksemba mapang Blinken-i, "tawa tanü puti otsü nungi langka angazükdi süra, Russia nung ner kidangi khen aitra parnok odaktsütsü kanga

tasak akümer," ta tekümdangtsü metetdaksü.

"Kazakh nung ketdangsürtem aser sorkari longkak aitertem temeden akhümtsübuu aser temzüng ozüng kübok tensa aziüoktetsü ta bilemer.

"Anungji parnoki kechiba tangalen nungi teyari nüngdaker aji mangateter. Onoki iba indang tali tejangjaba metetstü merangdar," ta Blinken-i ashi.

Kasa mapang nung US-i, Almaty nung parnok indang consulate nungi non-essential staff tem kar kidangi meyipa arutsü temelaba agütsüogo.

Russia nung paratrooper unit karbok Kazakhstan tonga ogo aser parnoki Hokolbarnü longkak aitertem ket nungi airport meyipa agiba nung teyari agütsüogo.

Kazakh sepaitemia jenjang tesashi agia Almaty yimti tanaben aziükogogo. Brehostibarnü local media balala-i video ajanga sorkar sepaitemi longkak aitertem dak injang akhaba sayuogo.

Interior Ministry-i ashiba agi, tang tashi nung ozüng raksar nisung 26 aser security officers 18 tepsetogo aser tir Tokayev-i iba mepetmesü ya bendanger kiralongrartem dak tai tongloktsüogo.

Liquefied petroleum gas (LPG) jenjang anasü agi timba

akümba sülen Deobarnü longkak ait tenzü.

Sorkari totzü jenjang ya ita trok tsüngda taoba mapang ama kümdaktsütsü ta shiogo. Ajisüaka iba osang sangdongba ajanga longkak aitba menokdangtet aser ano yimden yimsüsüba tsütsü tanga timtem bendenloker tali longkak ait tenzüka liasü.

Kazakhstan nung opposition political party tashi tait ka mali aser election tem timba ruling party-i vote tem noklang nung noklang ngua akoker. Linük nung taoba tir Nursultan Nazarbayev-i küm 29 yimsüsü asü aser tir mapa toktsüba sülena pa kanga tashi ita lir.

Tokayev-i pa linük indang security council tekolakba mapang bener aliba nungi aginogo.

Honibarnü sangdong ka ajanga ashiba agi, taoba Ato Kilonser aser chief, Karim Massimov Brehostibarnü puogo. Pai tanga ketdangsürtem den longjemmer sorkar atsüngtoktsü merang ta temulung meleme bilemba atema apu.

Kasa mapang nung tir Kassym-Jomart Tokayev-i iba mepetmesü ya kiralongrartem dak tai tongloktsür aser pai Hokolbarnü item nisungtemi timtem agütsüba aziüktsü atema parnok khasetstü tetuyuba agütsüogo.



Noksa nung JFK International Airport kima Sikh nung taxi anishir ka züka merenshiba angur. Iba tatalokba ya India nungi jakzükba Sikh nung tesempa agi merenshiba ken o ka ta temulung meleme bilemer.

### Ethiopia-i telungpur lenirtem chiokogo

**Addis Ababa, Aenjeti/ January 8 (Agencies):** Ethiopia sorkari ashiba agi, linük nung Orthodox Christmas amungba nüngtem nung parnoki tongtibang opposition lenirtem chioktsü.

Hokolbarnü Ato Kilonser Abiy Ahmed-i, sorkari linük ajunga longjemshitsü nükjidong nung iba jenjang agi, ta ashi.

Lenirtem chiokba rongnung Tigrayan People's Liberation Front (TPLF) telungpur lenirtem densema lir.

Sorkar sepaitem aser telungpurtem küm ka dak tema raraa arudar aser iba rara nung nisung meyirejang aika taküm samaogo.

Sorkar sepaitemi telungpurtemi atsünger aliba jilatem aika atsüngba mapang ita 15 raraba sülen tang tepuokertem chioktsü atema jenjang agiogo.

Taitok agütsüba indang sangdongba mapang sorkar communications service-i ashiba agi, telongjem atema inyakyim tongtibangtibaji sensaksem lir. Ethiopia-i iba rara anendaktsütsü atema kechi südir süaka bendanga agütsütsü.

"Ethiopia nung tebilemstütem yimjung aser azü metokshi bentetstü atema lenmang mesapoktsütsü asoshi iba

jenjang agi.. talisa lokti ajak anisemer national sensaksem takok asoshi iba jenjang agi," ta kasa sangdong ajanga metetdaksü.

Ajisüaka TPLF telungpurtem den sensaksem indang osang kecha magütsü, shirnoki taoba ita sorkari yimden yimsüsüba dak sendakba nung tepuokertem chiokba den Tigray sabanga aliba lapoktsüra sensaksemstü atema mulunga lir ta shiogo.

State media sangdong ka ajanga ashiba agi, TPLF lenirtem chiokba rongnung party nguteter rongnung; Sibhat Nega aser taoba Tigray tesem tir Abay Weldu na densema lir.

Maneni ethnic telok balala nungi lenirtema chiokogo.

TPLF sepaitemi linük yimtiba Addis Ababa km 300 agi dang metongi atsünga aruba sülen hopta ishika tsüngda sorkar sepaitem asendenshiba ajanga parnok atsüngin tenzüko.

Abiy-i iba tesem nung aliba telungpurtem amaktsü tetuyuba agütsüba sülen Tigray nung 2020 küm November ita mangatetep tenzü.

Paisa, military base ka amakba atema iba tetuyuba agütsü, ta ashi. Abiy-i aniba sorkar aser TPLF lenirtem tsüngda ita aika mangatetep adoka aruba sülen tensa tamajungba aküm.



Paris, January 8: Alima nung January 1 nungi 7 tsüngda anogo nung coronavirus cases million ana dak tema potetba jangjaogo. Anogo tenet tsüngda average nung anogoshia nisung 2,106,118 dak tashidak poteta liasü.

### Duterte-i vaccine magirtem tepuokdaki yokner

**Manila, Aenjeti/January 8 (Agencies):** Philippines nung nisung 21,819 dak COVID-19 tashidak potetogo aser nisung 70,049 dak tashidak tendangba sülen positivity rate 40% junger aliba mapang ka nung tir Rodrigo Duterte-i vaccine magi alir shirnok ki toktsür maotsü tetuyuba agütsü aliba sülen manidaker parnok aputsü tetuyuba agütsüogo.

Hokolbarnü densema linük nung anogo asem atonga nisung aika dak tashidak potetogo. January 1 nü bo nisung 3,617 dak dang tashidak poteter liasü.

Linük nung positivity rate 40 percent ajungba ya World Health Organization indang five percent positivity threshold dang nungi kanga agi timba lir.

Philippines nung nung tang nisung 77,369 dak tashidak poteter lir, koba October 17 nü sülen timtiba asütsü. Kasa mapang nung tashidak agi nisung 129 asüba sülen linük nung tashidak agi asür nisung 51,871 jungogo.

Tashidak potetertem ya timba linük yimtiba Manila aser yimti temeket nung aliba tesemtem nungi lir.

Health ketdangsürtem aser mongintemi, hopta ishika tsüngda tashidak menar timba akümtsü aser ita tatemi tashidak kanga mejungi prokshir alitsü, ta tekümdangtsü metetdaksüogo.

Tashidak ajungbena kanga kara menatapa aoba janga Duterte-i Brehostibarnü vaccine magi alir shirnok ki toktsür maotsü atema tetuyuba agütsür aliba sülen manidaker parnok ajak aputsü tetuyuba agütsüogo.

Philippines nung coronavirus vaccine agitsü ya pei mulungka nung agi aser linük nung nütsünyongsük tesadang dak tajemba dang vaccine agi lir.

Health tsütsü mongintemi ashiba agi, tang tashidak potetertem ya Omicron variant agi animesoba lir.

Tang tenokdangba agütsür aliba nung, vaccine magi alirtem tenüngdakba oset alitsü mesera exercise agitsü atema dang pei ki toktsür otsü melatsü.

Restaurant, park, tekülemdak aser beauty salon tem nung nisung ajemshitsüogo aser kasa mapang nung in-person classes aser contact sport tem ajak tenokdangba agütsür lir.



## Madhur Bhandarkar dak Covid-19 putet



Madhur Bhandarkar (File photo)

**New Delhi, Aenjeti/January 08, 2022 (Agencies):** Actress Swara Bhasker sülen, Bollywood nung tesüsa Covid-19 puteter tongtibang nübu rongnung film yanglur Madhur Bhandarkar asütsü.

Honibarnü, Twitter nung Madhur-i iba osang lemsatepa liasü. Film yanglur Madhur-i ashiba agi, iba tashidak temaitsü agi terara kangshidar aser takdang balaka nung anepalua mungdar. Tesüiba anogo kü den ajuruteper ajak dang Covid-19 tendangtsü asoshi mepishir, ta ashi.

"Kü dak Covid-19 positive putet. Vaccine dose anaprongla agiogo, saka iba

wara temaitsü agi terara kangshidar aser quarantine südar. Kü den ajuruteper ajak dang Covid-19 tendangtsü asoshi mepishir. Imlibilema kümdanga alitsü merangang aser teti covid-19 tetuyubung anidakang," ta Madhur Bhandarkar-i ashi.

India nung Covid-19 variant tasen - Omicron ya kanga kara menashia oadar. Tesüiba hopta ishika nungi Omnicron putteter timba tudar. Iba den külemi Bollywood aser television nung nungtugu nisung aika dak iba tashidak putetogo. Hokolbarnü, Music composer Vishal Dadlani aser actress Kubbra Sait napronglai tena dak COVID-19 putetba osang lemsatepa liasü.

Instagram nung Vishal-i, "Iba tashidak temaitsü agi terara shirangdar. Shooting dak alaka (kong film maparen nung adener ajak Covid test agir sülen ang inyaker), tejak nembangba mask inoker sülen ang nisung den ajuruteper. Iba den külemi sanitise' masüba oset kecha nunga mekongshi. Iba wara temaitsü agi terarabo

kangshidar, saka temang kanga tashimait lir. Nenok ajak dang kümdanga alitsü mepishir," ta pai lemsatep.

Swara Bhasker-i la dak Covid-19 putetba osang metetdaksü aser tekümdangtsü mera agitsü asoshi la den ajuruteper ajak dang Covid-19 test agitsü mepishiogo. Sangdong ka nung, Swara-i, January 05, 2022 nungi la den kibong nung züngsem ajak quarantine südar, ta metetdakja liasü.

"Kü dak Covid-19 positive putet. January 05, 2022 nü iba tashidak temaitsü agi kangshitsü tenzük aser RT-PCR test ajanga kü dak iba tashidak aliba osang jangjatet. January 05, 2022 nikongdang nungi ni aser kibong nung züngsem ajunga quarantine südar aser nungdakba meratem nung anidaka anepaludar. Kü den ajuruteper ajak dang ni osang agütsüogo aser parnok dang Covid-19 tests agitsü mepishir. Teti tejak nembangba mask inokang aser iba wara nung kümzüka alitsü merangang," ta Swara-i lemsatep.

## Happy 80th Birthday Anniversary

(09.01.42 - 09.01.22)



N.N. Walling

Tematiba Tsüngremi ano tali moajangma.

Happy Birthday

Mrs. Watila Walling,  
Chirnur, Anük-Amo aser  
Semchirtem.

## Golden Disc Awards 2022: BTS-i award pezü angu

**Seoul, Aenjeti/January 08, 2022 (Agencies):** Honibarnü, Seoul kübok Gocheok Sky Dome nung 36buba Golden Disc Awards sentong agia liasü. Taoba küm, Golden Disc Awards sentong ya anogo ana agi, saka 'social distancing' tetuyuba nung anidaka taküm iba sentong ya anogo ka dang agi aser audience medeni iba sentong ayongzük; aser sentong nung shilem agitsüpurtem jelia record ser sayu (pre-recorded performance), ta Album & Digital Song divisions sangdong ajanga metetdaksü.

Golden Disc Awards 2022 sentong nung nungtugu kentener telok BTS-i award pezü angu. Iba sentong nung anaben tashi Grammy Awards atema nominate asür telok - BTS-i grand prize (Daesang) aser main prize (Bonsang) agizüka liasü. BE kensep atema BTS-i Album of the Year Daesang, seezn Golden Disc Popularity Award, Album Bonsang aser Digital Bonsang award angu.

Kasa sentong nung IU indang 2021 küm sayaba ken - Celebrity ajanga Digital Song of the Year Daesang aser Digital Song Bonsang angu. STAYC aser aespa nati Rookie of the Year award agizük. Aespa-isa 'All Artist of the Year Award' nguogo.

Küm pungobuba tashi atonga, BTS-i 'Album of the Year (Disc Daesang)' award aser IU-i küm tanabuba atonga 'Digital Song of the Year (Digital Daesang)' award takok angur asütsü.

November 2020 aser November 2021 tsüngda sayaba ken aser kensep ajak nungi iba award atema nominee tem shim. Iba den külemi Major category atema nominee tem streaming timba aser kensep timba ayokba

nungi asadanga liasü.

Golden Disc Award 2022 sentong ya Lee Seung-gi, Lee Da-hee aser Sung Si-kyung nungeri ketdangtsüa (host) agi. Actor talisa Jung Woo-sung, Ju Ji-hoon, Park Hee-soon, Oh Jung-se, Woo Do-hwan, Jeon Jong-seo, Ahn Hyo-seop, Lee Do-hyun aser Ahn Bo-hyun nungeri takok angur nem award agütsü.

Taküm iba award sentong nung TAYC, Stray Kids, Big Mama, SEVENTEEN, IU, aespa, ENHYPEN, THE BOYZ, Oh My Girl, TXT aser Heize nungeri shilem agiogo (pre-recorded performance). BTS-ia 'Permission To Dance On Stage In LA' sayua liasü.

\* **Golden Disc Awards 2022 nung takok angurtem:**

- Disc Daesang (Album of the Year): BTS' Be
- Digital Daesang (Song of the Year): IU's Celebrity
- Seezn Most Popular Artist Award: BTS
- Rookie Artist of the Year: aespa, STAYC
- Artist of the Year: aespa
- Best Solo Artist: Lim Young Woong
- Best Group: Brave Girls
- Digital Song Bonsang (Main Award): aespa's Next Level; AKMU's Nakka with IU, BTS' Butter; Heize's Happen; IU's Celebrity; Lee Mu Jin's Traffic Light; Oh My Girl's Dun Dun Dance; STAYC's ASAP
- Album Bonsang (Main Award): BTS' Be; ENHYPEN's Dimension: Dilemma; IU's Lilac; NCT 127's Sticker; NCT Dream's Hot Sauce; Seventeen's Attacca; Stray Kids' Noeasy; TXT's The Chaos Chapter: Freeze.
- Best Performance: Jeon So Mi, The Boyz
- Cosmopolitan Artist Award: aespa, Seventeen

## Biopic ka nung Rajkumar Rao-i Srikanth Bolla shilem agitsü

**Mumbai, Aenjeti/January 08, 2022 (Agencies):** Actor Rajkumar Rao-i biopic tasen ka nung visually impaired (nükpoker) industrialist, Srikanth Bolla shilem agitsü. 'Srikanth Bolla' ta nungja agütsüba film atema Sumit Purohit aser Jagdeep Sidhu nati script zülutsüogo aser Tushar Hiranandani-i iba biopic direct asütsü. Taoba mapang Tushar-i 'Saand Ki Aankh' direct süa lir.

Iba character indang jembiba mapang, Rajkumar Rao-i "Srikanth Bolla taküm

otsü ya ajak atema tatishitsü tulu lir aser pa taküm otsü nung ajemdaker shilem agitsü ni shimba ya atangji nunga maongka tuluka asütsü. Pa (Bolla) taküm nung timtem jenti ajangshiba otsü aikati metetta alitsü akok aser timtem balala ajuruaka pai tezümetangi inyaker aser screen atema pa taküm nung ajemdaker shilem agitsü asoshi yongyar. Iba project nung Bhushan den tanaben longjemer inyaksü maongka anguba asoshi pelar," ta ashi.

Srikanth Bolla, shiba Andhra Pradesh kübok

yimtsüing tilaka nungi lir, pa ya sensaker kibong ka nung lir. Class 10 pass asüba sülen, science azüngtsü asoshi pai state den tebilemba lemsatep. Class 10 aser 12 exam nung marks tajung anguba dang masü Massachusetts Institute of Technology, USA nung azünger 'international blind student' rongnung pa mezüing Srikanth mezüing aküm.

Iba film atema senotsü tsütsü Bhushan Kumar aser Nidhi Parmar Hiranandani nati yaritsü aser July 2022 nungi tangoktsü sentong reneymar.

## 'Loop Lapeta' Netflix nung sayatsü

**Mumbai, Aenjeti/January 08, 2022 (Agencies):** Taapsee Pannu aser Tahir Raj Bhasin na indang film - 'Loop Lapeta' ya taruba ita Netflix sabang nung sayatsü terenemba lir.

Honibarnü, Taapsee-i Instagram nung, February 4 nü 'Loop Lapeta' film sayatsü osang fans den lemsatepa liasü.

"Sony Pictures Films India Feature aser Ellipsis Entertainment Production film - Loop Lapeta, koba Aakash Bhatia-i direct süogo, iba film February 4 nü Netflix nung sayatsü," ta lai lemsatep.

Iba film indang jembiba mapang, Taapsee-i ashiba agi, "Taruba project Netflix nung sayatsü osang angashia pelar. Iba film director, Aakash aser co-star, Tahir den külemi iba project nung jangratema inyakogo. Fans nem iba film reprangdaksütsü asoshi



yongyar," ta ashi.

Iba film nung Taapsee den külemi shilem agir Tahir-i, "Loop Lapeta sayatsü asoshi yongyaseter. Iba film ajanga nüknüratepba otsü balaka sayatsü aser iba ama genre ka nung mezüing shilem agiogo. Alima dang iba film ajanga Satya aser Savi na otsü sayatsü asoshy matatetter. Director Aakash Bhatia-i tasa balala amshia iba film yangluogo, kong audience tem kanga

entertain asütsü imlar," ta lemsatep.

'Loop Lapeta' ya Sony Pictures Films India, Ellipsis Entertainment den Aayush Maheshwari longjemer produce süogo. Iba project ya Tom Tykwer indang nungtugu kaket - Run Lola Run nung ajemdaker yangluba Bollywood film ka asütsü.

Loop Lapeta film ya February 04, 2022 nü Netflix nung sayatsü.

# 60buba ZVYSO Sports meet tembangogo



**Kohima, Aenjeti/January 08, 2022 (TYO):** Zhadima Village Youth and Sports Organisation (ZVYSO) pur 60buba annual sports meet, koba anogo 8 tashi ayongzük, Honibarnü Zhadima yimtsüing nung iba sports meet tembangogo, ta sangdong ka ajanga metetdaksü.

Iba sports meet shibangba sentong nung tetushi tesemdang ama Joint Mission Director, Samagra Shikha, Nagaland, Dr. Kevizakie Rio dena liasü.

Pei sempet jangjatetsüla aser temaba jenjang tongtetsü asoshi iba sempet tajungtiba nung amshitsüla, ta Rio-i lanurtem ayongzük.

Iba yimtsüing (Zhadima) nung lanurtem tsüingda saisapong aser music tsütsü renloka aoba ngua Rio-i pelaba metetdaksü aser pei jangraba maparen nung temulung agüja inyakatsü aser iba nung terenlok lidaktsütsü asoshi pai lanur nem tetuyuba agütsü.

State nung lanur aika mapa manguba indang timtem metetdaksüba mapang, Rio-i lanurtem dang alu nung maparen balala inyaktsü asoshi atsüayonga mesüra akmesüna malitsüla, ta ashi.

Koba maparen nung südir süaka, State nung sempet tajung alir lanurtem nungdaker asünung, pei dak aketba sempet jangjatetta

ibaji tajungtiba nung amshitsü nungdaker, ta pai ajungshia liasü.

Maneni, iba sports meet shibangba sentong nung, Rio-isa takok angur nem medal aser certificate agütsü. 60buba annual sports meet nung sobaliba saisapong talisa bamboo slit walk, top (khouthuo), Tholi tem den külemi tanga saisapong asayaogo.

- Men's football winner: Phelhuozou Khel; Runner up: Kimho Khel-II 'A'

- Men's volleyball champion: Kimho Khel-II 'A'; Runner up: Basa Khel 'B'

- Women's volleyball champion: Basa Khel 'A'; Runner up: Rüziake Khel

# Nokdenlemba Open Volleyball Trophy Jan 18-20 asayatsü

**Mokokchung, 8 JAN (TYO):** 4 buba Nokdenlemba Open Volleyball Trophy tan ita January 18-20, 2022 "One Team-One Spirit" omen dak rangloker Multi Sports Complex Mokokchung nung asayatsü sentong lir, ta Nokdenlemba Open Volleyball Trophy 2022 Organizing Committee convener, Sunepwapang-i sangdong ka ajanga metetdaksü.

Nokdenlemba Open Volleyball Trophy ya running trophy ka aser ibai Ao Kaketshir Mungdang-i mezüing AKM tir

asür Nokdenlemba nem akhüm tetushi agüja ayongba asayamung ka lir.

Iba asayamung ya 2021 küm agitsüba liasü saka koda masüba Covid-19 wara ajanga magiteti athi, aji oda, taküm iba asayamung marok atema tetokteper telok aikati shilem agitsü onoki imlar, ta tayongertemisa metetdaksü.

AKM-i iba asayamung küm 10 dak tali takok ngua ayonga arudar. Taküma iba marok shir teloki bendir Champion nem senpet sen lakh ka den trophy aser certificate, tanabuba

jenjang runner-up nem sen 60,000/- den certificate agütsütsü. Iba den semi finalist tashi tongteter nem sen 20,000/- aser ano nija senpet (individual prizes) kar densema agütsütsü tayongertem terenemba lir.

13th Jan, 2022 nungi AKM office nungi registration form agütsütsü, anungji, tejangrartemi office mapang arua agizütsü akok aser iba asayamung dak sentakba nung osang tejangja metetnürtemi iba number - 8731049595 nung tongtepretep asoshi parnokisa metetdaksü.

# Adelaide International: Bopanna aser Ramanathan final-i iogo



Bopanna & Ramanathan

**Adelaide, Aenjeti/January 08, 2022 (Agencies):** Honibarnü, Adelaide International (ATP 250 tournament) asayamung tebur tarep semi final nung India nung Rohan Bopanna aser Ramkumar Ramanathan nati takok ngua final tongogo. Aruya aliba Australian Open atema Adelaide International ya renemshiba asayamung ka ama asayar.

Tebur tarep semi-final asaya nung Bopanna aser Ramanathan

nati Bosnia o Mexico nung seed pezüba Tomislav Brkic aser Santiago Gonzalez madak 6-2 6-4 agi takok angu.

ATP 250 final nung India nung tarep yagi top seed Ivan Dodig (Croatia) aser Marcelo Melo (Brazil) na den asayatsü.

Taoba asayamung balala nung arishi küm 41 tain Bopanna aser Dodig na longjemer shilem agiba ajaki jangjaa lir. 2021 küm September ita US Open nunga tena asayaogo saka tebur tarep

tasembuba round nung tena tsükadok.

Bopanna aser Ramkumar, shiba tang asaya aliba ATP Tour nung mezüing shilem agir asütsü, iba asayamung tenzüker nungi round balala nung tenati junga asayaogo.

Adelaide International ya aruya aliba Australian Open atema renemshiba asayamung ama lir. Australian Open ya January 17, 2022 nungi Melbourne nung asayatsü.

# Adelaide International: Barty aser Elena final asayatsü

**Adelaide, Aenjeti/January 08, 2022 (Agencies):** Honibarnü, Adelaide International tetsür kija semifinal nung Australia tsür Ashleigh Barty-i seed pungobuba Iga Swiatek madak takok ngua final tongogo.

World no.1 Barty-i 6-2, 6-4 agi Poland tsür Iga tsükdaksü. Barty-i Kazakhstan tsür Elena Rybakina den final asayatsü. Kasa anogo tetsür kija semi final asaya tanga ka nung seed tenetbuba Elena-i Japan tsür Misaki Doi madak 6-4, 6-3 takok ngua final tongogo.

Taoba küm Covid-19 tensa süngjema maoba ajanga September ita US Open nungi Barty

tukadokba sülen, tan hopta lai top 25 nung alir asayar asem den asaya liasü.

Iba asayamung tanabuba round nung Barty-i America tsür Coco Gauff madak takok angu aser quarter final nung lai taoba mapang Australian Open champion Sofia Kenin tsükdaksü.

"Iba asayamung tenzüker külen nungi tanü tashi round ajak kanga tasak liasü. Match ka danga ayong ayonga masayatet, saka alima nung asayar tajung balala den toktepa asayatsü janrar. Match shia asaya yimya tajungba melenshia shilem agi ama ni bilemer aser asüing tajungtiba asayatsü imlar," ta Barty-i ashi.

# ATP Cup: Canada-i Russia koka final tongogo

**Sydney, Aenjeti/January 08, 2022 (Agencies):** Honibarnü ATP Cup asayamung tebur tarep semi final nung Canada nung Felix Auger-Aliassime aser Denis Shapovalov nati defending champion Russia nung Medvedev aser Safiullin madak takok ngua final tongogo.

Tebur kija mezüing semifinal nung Shapovalov-i 6-4, 5-7, 6-4 agi Roman Safiullin tsükdaksü. Ajisüaka, tanabuba semifinal nung world no. 2 Daniil Medvedev-i world no. 11 Auger-Aliassime madak 6-4, 6-0 agi takok angu.

Tebur tarep nung Felix Auger-Aliassime aser Denis Shapovalov nati 4-6, 7-5, 10-7 agi Daniil Medvedev aser Roman Safiullin tsükdaksü, koba Canada-i Russia madak 2-1 agi takok angu. ATP Cup putiotsü

nung Canada-i taküm mezüing final tongtetter asütsü.

Deobarnü Canada-i Spain (Roberto Bautista Agut aser Pablo Carreno Busta) den final asayatsü. Tan hopta tebur tarep nung Medvedev aser Safiullin na 3-0 agi tejakdang ser asaya aruogo.

Hokolbarnü, kasa asayamung tebur kija semi final nung Spain nung Roberto Bautista Agut-i 7-6 (6), 2-6, 7-6 (5) agi Poland nung Hubert Hurkacz tsükdaksü. Semi final tanga ka nung külem Spain nung Pablo Carreno Busta-i Jan Zielinski madak 6-2, 6-1 agi takok ngua final tongtet.

Group stage nung Kamil Majchrzak-i asaya asem tashi takok ngua Poland 3-0 agi tejakdang kümadok, saka pa dak Covid-19 positive putetba ajanga iba asayamung nungi pa tukadok.

# Danushka Gunathilaka Test Cricket nungi anener

**Aenjeti/January 08, 2022 (Agencies):** Sri Lanka nung batter takotet, Danushka Gunathilaka-i white-ball format nung temulung agütsütsü tebilemba nung arishi küm 30 nung Test Cricket nungi anentsü telemtetba agiogo, ta Honibarnü Sri Lanka Cricket (SLC) sangdong ka ajanga metetdaksü.

Sri Lanka Cricket (SLC)-i ashiba agi, "Danushka-i cricket asaya format tatsüba nung temulung agüja asayatsü tebilemba lir."

Bio bubble security nung aibelenba ajanga küm ka tashi Gunathilaka, Kusal Mendis aser Niroshan Dickwella nung cricket nungi nokdang aliba temzüing salar anogo ka lir ano arishi küm 30 tain batter Bhanuka Rajapaksa-i International Cricket nungi anenba osang sangdonger sülen Danushka-i iba osang sangokja liasü.

Gunathilaka, shibai mapang

talangka asadanger sülen Test Cricket nungi anentsü telemtetba agi, 2018 nungi pai Test asayamung ka nungdanga shilem agidanga mali. Test cricket nung ajemoker külen nungi Gunathilaka Danushka-i Test match 8 nungi half century ana (61 run best score) densema run 299 yanglua lir.

Limited over cricket nunga pai record yanglua lir. ODIs 44 nung Danushka-i run 1,520 (average 36.19) aser T20Is 30 nung pai run 568 (strike rate 121.62) yanglua lir.

Taoba küm Sri Lanka team England nung asayaba mapang bio-security temzüing anema aibelenba atema team nungi asayar asem Gunathilaka, Mendis aser Dickwella nung küm ka shi international cricket nungi anenja liasü.

Iba tenokdangba den külemi par asemprongla ita trok tashi domestic cricket nungi agiena liasü aser senchi USD 50,000 achi.

## BILEMDANGANG

"Ochi oji ochi mapa agi kuli asütsü."